



NOGOMETNI SAVEZ UNSKO- SANSKOG KANTONA

77000 Bihać, Dvorana Luke bb

tel/fax: ++387 37 220 283, žiro račun: 3385002200518445 UNICREDIT Banka Bihać

Broj: 370/13

Bihać:31.07.2013.godine

Izvršni odbor NS USK-a ,na osnovu člana 31 h) Statuta NS USK-a i člana 4.Pravilnika o nogometnim takmičenjima NS/FS BiH,na sjednici održanoj dana 31.07.2013.godine,na prijedlog Takmičarske Komisije NS USK-a,donio je slijedeće

PROPOZICIJE

Takmičenja za prvenstvo Nogometne lige NS USK-a za takmičarsku 2013/2014 godinu

OPĆE ODREDBE

Član 1.

Ovim propozicijama utvrđuje se način organiziranja i provođenja takmičenja u nogometnoj ligi kantona u takmičarskoj 2013/2014 godini.

Član 2.

Prvenstvo nogometnih klubova NS USK-a za takmičarsku 2013/2014 godinu odvijat će se u okviru jedinstvene lige seniora.

Član 3.

U takmičenju za prvenstvo seniora NS USK-a za takmičarsku 2013/2014 godinu sudjeluje do 16 /šesnest/ klubova sa prostora Nogometnog saveza Unsko-Sanskog kantona.

Član 4.

Za učestovanje u takmičenju kantonalnih liga pored ostalog klubovi moraju ispunjavati slijedeće uslove :

Igralište :

1. da posjeduje odgovarajuće igralište sa travnatom površinom za igru dimenzija 100-110 m dužine i 64-75 m širine. Teren mora biti travnat cijelom površinom i potpuno ravan da bi omogućio normalno kretanje.Teren za igru mora biti odvojen od gledališta žičanom(zatvorenim) ogradom odgovarajućeg kvaliteta. Ograda mora biti udaljena najmanje 2(dva) m od uzdužne linije igrališta i 3(tri) m od poprečne linije iza vrata(golova) u visini kaznenog prostora.Minimalna visina ograde je 120 cm.

2. Igralište mora posjedovati zaštitne kabine odgovarajućeg kvaliteta za rezervne igrače i stručno rukovodstvo ekipa za najmanje 13 (trinest) osoba i odvojenu kabinu za delegata utakmice,a sve zaštićene od kiše i vjetra.Kabine se postavljaju na uzdužnoj strani igrališta,propisno udaljene od terena za igru,odnosno uzdužne linije (2-3 m).

3. Na stadionu moraju postojati svlačionice za obje ekipe i posebna svlačionica za suce.Sve svlačionice trebaju imati mokre čvorove-kupatila sa toplom vodom,za igrače najmanje 3 (tri) tuš ruže,a kod sudaca 1 (jedna) tuš ruža. Svaka svlačionica(sudijska posebno) treba imati zaseban WC.

4. Izlazak na teren i povratak igrača u svlačionicu,stručnih rukovodstava ekipa,delegate i sudija mora biti obezbijeđen i odvojen od gledalaca.

5. Na stadionu treba biti posebna prostorija za sastavljanje zapisnika .

6. Igralište mora biti primljeno od nadležne Komisije za prijem igrališta i registrirano za odigravanje prvenstvenih utakmica.Zapisnik o prijemu-registraciji igrališta treba da je javno istaknut u prostoriji gdje se sačinjava Zapisnik utakmice.

OSTALI UVJETI

Član 5.

1. Klub mora isunjavati uvjete iz Normativa minimuma stručno-pedagoškog rada za mlađe kategorije nogometaša u osnovnim Nogometnim organizacijama.

2. Klubovi koji ne ispunjavaju uvjete iz člana 4. "igrališta" ovih propozicija mogu u cilju provođenja takmičenja uzeti po zakup igralište nekog drugog kluba ili vlasnika potpisivanjem sporazuma o korištenju igrališta, s tim da isto ispunjava uvjete člana 4. pod "igralište" ovih propozicija.

3. Da organizira nogometnu aktivnost sa takmičarskim ekipama predpionira (U-13), pionira (U-16), kadeta (U-17) i juniora (U-19) od kojih je najmanje jedna (predpioniri) obavezna da učestvuje u takmičenju koje organizira Nogometni savez Unsko-Sanskog kantona.

4. Za prvenstvene utakmice klub domaćin, odnosno organizator obavezan je osigurati najmanje 3 /tri/ lopte, koje u svemu moraju odgovarati propisima Pravila nogometne igre. U slučaju da se utakmica igra po snijegu-odnosno da je teren pokriven snijegom, lopta mora biti crvene boje.

Član 6.

Takmičenjem nogometnih liga USK-a rukovodi Izvršni odbor NS USK-a putem takmičarskog organa. Način rada i odlučivanja takmičarskih organa regulisat će se posebnim pravilnikom o radu.

Član 7.

Prvenstveno takmičenje u nogometnoj ligi USK-a provodit će se po dvostrukom bod sistemu i vremenski utvrđenom kalendaru sa 2 (dvije) takmičarske polusezone- jesen i proljeće .

Kalendar i raspored takmičenja ,na prijedlog Takmičarske komisije, usvaja izvršni odbor NS USK-a najkasnije 30 /trideset/ dana prije početka jesenskog odnosno proljetnog dijela prvenstva .

Raspored utakmica za prvenstvo nogometne lige USK-a određuje se žrijebom brojeva klubova učesnika i primjenom Bergerovih tablica.

Član 8.

Nakon utvrđenog rasporeda takmičenja za prvenstvene i kup utakmice, klubovi su obavezni u roku od 5 /pet/ dana da dostave u Sekretarijat za takmičenje:

- Naziv igrališta na kome će se igrati utakmice
- Mjesto odigravanja utakmica
- Spisak igrača za tekuću takmičarsku godinu
- Boju dresova /gaćice, majice, štucne/, kao i rezervnu boju s kojom će klub nastupati
- Dan odigravanja utakmice /subota ili nedelja/

Prije utvrđivanja vremena početka utakmice treba voditi računa o vremenskim prilikama, godišnjem dobu i pomjeranju vremena, kao i o tome da određeni termini ne budu na štetu gostujuće ekipe.

Član 9.

Klub domaćin igra utakmice u mjestu sjedišta kluba, a u nedostatku terena na drugom primljenom igralištu za koje je dobio saglasnost nadležnog organa, koji ne može biti van općine u kojoj je sjedište kluba, izuzev ako se radi o terenu koji se nalazi na području druge općine, a nije udaljen više od 50 km od mjesta sjedišta kluba.

Igralište koje klub prijavi pred početak takmičarske sezone ne može mijenjati tokom sezone, izuzev u iznimnim situacijama o kojima odlučuje takmičarski organ uz poštovanje principa regularnosti takmičenja.

Član 10.

U interesu što regularnijeg završnog dijela takmičenja, 3(tri) posljednja kola igraju se istog dana, u isto vrijeme, prema utvrđenom rasporedu takmičenja, izuzev ako nema utjecaja na tabelu, a klub domaćin ili gost imaju opravdan razlog za pomjeranje termina uz saglasnost oba kluba i komesara takmičenja.

Klub je dužan na teren doći najkasnije 90 minuta prije utakmice i nastupiti sa najboljim sastavom .

PROMIJENA TERMINA UTAKMICE

Član 11.

Promijena termina odigravanja utakmice može se vršiti na osnovu podnesenog pismenog zahtjeva zainteresiranog kluba, koji mora biti podnesen Komisiji za takmičenje NS USK-a najkasnije 8 (osam) dana prije utvrđenog termina odigravanja utakmice.

U slučaju kada zahtjev za promjenu termina nije podnesen u skladu sa predhodnim stavom Komisija za takmičenje može promijeniti termin utakmice samo ukoliko je klub koji traži promijenu termina dostavio pismenu saglasnost drugog kluba, što je moguće najkasnije 3 (tri) dana prije utvrđenog termina utakmice.

Član 12.

Utakmice se mogu igrati samo na travnatim terenima koji su spremni za igru ukoliko ispunjavaju uslove iz člana 32. Pravilnika o nogometnim/fudbalskim takmičenjima NS/FS BiH i člana 4. Pod "igrališta" ovih Propozicija.

Klub domaćin je obavezan da teren pripremi za igru tako da bude potpuno pripremljen za odigravanje utakmice. Da li je teren pripremljen za igru ili nije odlučuje glavni sudija koji je određen da vodi utakmicu. Sudija će u zapisnik navesti da li je ili nije teren osposobljen za igru radi uzroka više sile ili zbog nemarnosti kluba domaćina.

Ako se u toku takmičenja neka utakmica ne odigra zbog neobezbjedenog terena krivicom kluba domaćina-organizatora utakmice ista se na osnovu člana 60. Pravilnika o nogometnim/fudbalskim takmičenjima NS/FS BiH ima registrovati službenim rezultatom 3:0(par-forfe) u korist protivnika-gostujuće ekipe.

Sudija i delegat obavezni su da u zapisnik unesu zaključak o neispravnosti terena ili zaključak da teren nije bio obezbeđen. Delegat će zapisnik dostaviti nadležnom organu u roku od 24 sata, u smislu člana 35. Pravilnika o nogometnim/fudbalskim takmičenjima NS/FS BiH.

NAJMANJI BROJ IGRAČA

Član 13.

Utakmica ne može da počne ako jedan od timova nema najmanje 7 /sedam/ igrača, shodno članu 36. Pravilnika o nogometnim/fudbalskim takmičenjima NS/FS BiH i pravilu III. Pravila nogometne igre.

Igrači koji nisu upisani do početka utakmice u zapisnik, nemogu nastupati na utakmici.

Ako jedan tim za vrijeme trajanja utakmice ostane sa manje od 7 /sedam/ igrača, sudija je dužan zaustaviti igru, a ako u roku od 5 /pet/ minuta klub ne nastupi sa minimalnim brojem igrača, sudija je dužan da odsvira kraj utakmice, shodno članu 37. Pravilnika o nogometnim/fudbalskim takmičenjima NS/FS BiH i pravila III. Pravila nogometne igre.

Svaki klub prijavljuje u zapisnik 18 /osamnest/ igrača. U igri učestvuje 11 /jedanest/ prijavljenih igrača, a tokom utakmice mogu se izvršiti 3 /tri / zamjene.

Predstavnici klubova obavezni su dostaviti delegatu sastav ekipa sa ispravnim igračkim legitimacijama i licencama/akreditacijama službenih osoba kluba, najkasnije 60 minuta prije početka utakmice.

OPREMA NOGOMETAŠA/FUDBALERA

Član 14.

Ekipa na jednoj utakmici ne mogu igrati u istim ili sličnim bojama dresa.

Gostujući klub mora poštovati boju sportske opreme kluba domaćina, koja je prijavljena prije početka prvenstva u Sekretarijat saveza i objavljena u Biltenu NS USK-a.

Klub domaćin nastupa u prijavljenoj boji sportske opreme na utakmici.

Ako gostujući klub nema sportsku opremu druge boje, domaćin će mu posuditi opremu boje različite od svoje, a delegat utakmice će gostujući klub prijaviti zbog zanemarivanja obaveza i isti će snositi disciplinsku odgovornost.

Brojevi na dresovima moraju odgovarati onima na popisu igrača u Zapisniku o utakmici.

Ako su dresovi prugasti ili šareni, brojevi moraju biti na jednobojuj podlozi.

ORGANIZACIJA UTAKMICA - DUŽNOSTI KLUBOVA

Član 15

Organizaciju utakmica vrše klubovi domaćini koji igraju na domaćem terenu.

Klub domaćin isključivo je nadležan za red i sigurnost prije, tokom i nakon utakmice i bit će pozvan na odgovornost zbog bilo kojeg incidenta, te može biti kažnjen u skladu sa odredbama Disciplinskog pravilnika NS/FS BiH.

Klub domaćin je obavezan pripremiti teren za igru, a odluku o podobnosti terena za odigravanje utakmice donosi glavni sudija.

Svaki klub dužan je na teren doći 90 minuta prije početka utakmice i nastupiti sa najboljim sastavom tima.

Ne izvršavanje obaveze ovog člana povlači disciplinsku odgovornost prema odredbama Disciplinskog pravilnika NS/FS BiH.

Član 16.

Klub domaćin dužan je delegatu utakmice staviti na raspolaganje obrazac zapisnika za utakmice i da pruži svu neophodnu pomoć pri sastavljanju zapisnika.

Zapisnik se sastavlja u zato predviđenoj prostoriji na stadionu, uz prisustvu sudaca, delegata i predstavnika klubova.

Zapisnik se sastavlja u 4 /četiri/ primjerka od kojih prva 2 /dva/ originali pripadaju delegatu, a slijedeći klubovima.

Izveštaj sa utakmice i izveštaj delegata izrađuju se po završetku utakmice. Izveštaj delegate radi delegat, a izveštaj sa utakmice glavni sudija utakmice.

Zapisnik prije početka utakmice potpisuju delegate, glavni sudija i predstavnici klubova.

Ovlašteni predstavnici klubova, dužni su 60 /šezdeset/ minuta prije odigravanja utakmice delegatu utakmice, dostaviti na uvid spisak sa nogometnim legitimacijama igrača koji tog dana nastupaju, kao i licence trenera, ljekara i fizioterapeuta za tekuću godinu.

Ako delegate utakmice utvrdi da trener, ljekar ili fizioterapeut nema licence neće mu dozvoliti da bude u ograđenom dijelu terena za igru.

Član 17.

Klub domaćin dužan je da poduzme sve mjere u cilju obezbeđenja ličnosti članova ekipe, sudija i delegata kako za vrijeme odigravanja utakmice, tako i po završetku utakmice sve do napuštanja igrališta i mjesta odigravanja utakmice.

Klub domaćin je obavezan sačekati gostujuće navijače ako organizovano dolaze (što gostujući tim treba najaviti), smjestiti ih u gledalište na posebnom mjestu i izvršiti obezbjeđenje istih u toku i poslije utakmice.

Klub domaćin je također dužan da obezbjedi odgovarajuću dežurnu redarsku službu sa dovoljnim brojem redara /najmanje 8 (osam) redara/ vidljivo obilježenih, te prisustvo pripadnika MUP-a /najmanje 2 (dva) policajca /, dežurno sanitetsko vozilo sa osobljem i nosilima (može se koristiti adekvatno osobno vozilo, kombi ili auto sa četvoro vrata-karavan/, a po potrebi i druge službe.

Bez pripadnika MUP-a, redara, sanitetskog vozila i dežurnog ljekara minimum fizioterapeuta sa odgovarajućom medicinskom opremom utakmica se neće igrati, a sadržaj medicinske opreme - torbe regulisat će se posebnom odlukom Izvršnog odbora NS USK-a.

Klub domaćin obavezan je izvršiti prijavu utakmice (javnog skupa) kod nadležne policijske uprave i delegatu utakmice dokazati da je utakmica prijavljena kod PU ili da je izdato odobrenje (shodno važećim zakonskim odredbama).

Klub domaćin obavezan je osigurati snimanje utakmice i originalni snimak zapečaćen u kovertu, odmah po završetku utakmice uručiti delegatu utakmice, koji ne smije snimak pregledati nego ga je zapečaćenog dužan dostaviti takmičarskom organu zajedno sa zapisnikom utakmice.

Klub domaćin obavezan je omogućiti snimanje utakmice gostujućoj ekipi, ako to isti zahtjevaju.

Za nepoštivanje obaveza, protiv kluba domaćina primijenit će se disciplinske mjere po odlukama Disciplinskog pravilnika NS/FS BiH i posebnoj Odluci Izvršnog odbora NS USK-a.

Klubovi su odgovorni za ponašanje svojih navijača, službenih osoba, članova i navijača i svake druge osobe koja obavlja dužnost na utakmici u ime kluba.

PRAVO NASTUPA IGRAČA NA UTAKMICI

Član 18.

Na prvenstvenim utakmicama mogu nastupati igrači koji su stekli pravo igranja prema odredbama Pravilnika o registraciji, statusu i transferu NS/FS BiH, ukoliko su navršili 17 godina života, kao i igrači koji su navršili 16 godina, ali sa obaveznim specijalističkim ljekarskim pregledom kojim se proglašava sposobnim za nastupanje na utakmicama seniorskog pogona.

Odobrenje se mora ovjeriti u nadležnom savezu, a vrijedi četiri mjeseca od dana izdavanja. Ukoliko im je to pravo potvrđeno od nadležnog organa i isto mora biti upisano u nogometnu legitimaciju.

U satavu prijavljenog tima mora se nalaziti najmanje 5 /pet/ igrača mlađih od 21 godine života od kojih 3 /tri/ moraju započeti utakmicu.

Za takmičarsku 2013/2014 godinu kao mlađi od 21 godine života smatraju se igrači rođeni 01.01.1992. godine i mlađi.

IDENTITET IGRAČA

Član 19.

Na svim prvenstvenim utakmicama igrači moraju imati uredne sportske legitimacije izdate od nadležnog organa za registraciju, sa ovjerenom članarinom za tekuću godinu.

Protiv kluba koji ne poštuje ove odredbe povest će se disciplinski postupak prema odredbama Disciplinskog pravilnika NS/FS BiH, a klub može imati disciplinske i takmičarske posljedice.

Na prvenstvenim utakmicama mogu nastupati samo igrači čiji je identitet utvrđen putem nogometne legitimacije izdate od nadležnog organa za registraciju, a u slučaju njenog nedostatka identitet će se utvrditi na osnovu javne isprave - lične karte ili pasoša i u tom slučaju delegat će u prvu stranu zapisnika obavezno upisati broj lične karte ili pasoša, a u izvještaj i sve ostale relevantne podatke (matični broj, datum rođenja i dr.)

Ukoliko se identitet igrača utvrđuje na osnovu javne isprave klub je obavezan Komisiji za takmičenje (Komesaru) NS USK-a dostaviti sportsku legitimaciju u roku od 24 sata.

Identitet se utvrđuje prije početka utakmice, za vrijeme odmora na poluvremenu i neposredno po završetku utakmice, samo za one igrače koji su zakasnili na početak utakmice odnosno na početak drugog poluvremena, a upisani su u zapisnik utakmice.

Član 20.

Svaki igrač mora imati sportsku legitimaciju sa obilježenim datumom i ovjerenim ljekarskim pregledom (pečat) od strane Zdravstvene ustanove. Izuzetno, može imati zvaničnu ljekarsku potvrdu (sa tačnim datumom i pečatom ljekara i ustanove) o izvršenom ljekarskom pregledu u zdravstvenoj ustanovi, što se može primijeniti izuzetno i samo za jednu utakmicu nakon čega pregled mora biti upisan u sportsku legitimaciju..

Ljekarski pregled važi 6 /šest/ mjeseci, a za igrače mlađe od 17 godina važi 4 /četiri/ mjeseca.

Igrač koji nije upisan u zapisnik ili koji nije izvršio ljekarski pregled, ne može nastupati na prvenstvenim utakmicama.

Protiv kluba i igrača koji prekrši odredbe ovog člana bit će pokrenut disciplinski postupak prema odredbama Disciplinskog pravilnika NS/FS BiH.

NEDOLAZAK NA UTAKMICE, NEODIGRAVANJE, PREKID UTAKMICE I NENASTUPANJE RADI SUSPENZIJE

Član 21.

Protiv kluba koji ne nastupi na prvenstvenoj utakmici, koji izazove prekid utakmice, napusti teren ili ne nastupi zbog suspenzije, postupit će se prema odredbama Pravilnika o nogometnim/fudbalskim takmičenjima NS/FS BiH i Disciplinskog pravilnika NS/FS BiH.

Ove odredbe primjenjivat će se i protiv igrača, ukoliko učine prekršaj iz predhodnog stave.

Ako u roku od 15 /petnaest/ minuta od određenog vremena za početak utakmice stalnog takmičenja jedan tim ne nastupi sa potrebnim brojem igrača sudija će saopštiti kapitenu tima koji je nastupio da se utakmica neće odigrati i to će upisati u zapisnik.

Izuzetno, u slučajevima da klub nije mogao da nastupi usljed više sile, sudija će sačekati i nešto duže, al će voditi računa o tome da utakmica može da se završi na vrijeme.

Ukoliko je utakmica prekinuta iz razloga više sile, a prije isteka 80% regularnog vremena ili nije odigrana, utakmica će se odigrati narednog dana u isto vrijeme, a ako se ne može odigrati ni narednog dana, takmičarski organ će utvrditi novi termin za odigravanje utakmice.

Klub koji ne uplati prvu ratu kotizacije za troškove takmičenja i dugovanja po odlukama disciplinskog organa iz predhodnog takmičarskog perioda, najkasnije 15 /petnaest/ dana pred početak jesenjeg dijela takmičenja, automatski je suspendovan, utakmice ovog kluba neće se igrati, a nakon dvije neodigrane utakmice smatrat će se da je klub istupio iz takmičenja.

Druga rata kotizacije i kazne po odluci disciplinskih organa NS USK-a imaju se platiti najkasnije 15 /petnaest/ dana prije početka proljetne polusezone. U suprotnom, nastupa sankcija kao iz predhodnog stava.

Delegat je obavezan prije utakmice prvog dijela prvenstva, a isto tako i prije prve utakmice drugog dijela prvenstva izvršiti provjeru uplate kotizacije, kao i uplate dugovanja po izrečenim disciplinskim mjerama prema evidenciji NS USK-a. Ukoliko klubovi ne prilože dokaz o obavezama navedenim u predhodnom stavu u cijelosti, delegat neće dozvoliti da se utakmica odigra o čemu će odmah obavijestiti predsjednika Komisije za takmičenje NS USK-a.

Klub koji nastupi protiv suspendovanog kluba snosit će disciplinske posljedice po članu 60. Disciplinskog pravilnika NS/FS BiH.

DELEGAT UTAKMICE

Član 22.

Za sve prvenstvene utakmice, nadležni organ će delegiranjem odrediti delegata utakmice, koji zastupa takmičarsko rukovodstvo i ima vrhovni nadzor na utakmici

Nakon delegiranja, delegat dobija nalog Sekreterijata takmičenja putem pošte ili putem Interneta, u čijem sadržaju mora biti navedeno mjesto, datum i sat odigravanja utakmice, podaci o sucima, te troškovi koji im pripadaju.

U slučaju da na utakmicu ne dođe određeni delegat dužnost delegata obaviti će sudac susreta.

Listu delegate čine sportski radnici, a način izbora i kriterije za izbor delegata utvrđuje Izvršni odbor NS USK-a posebnom odlukom.

Delegat je dužan sat i pol prije odigravanja utakmice održati sastanak u prisustvu predstavnika klubova, sudija utakmice, komesara bezbjednosti, vođe patrole policije i drugih sa ciljem uvida u stanje igrališta, svlačionica igrača i sudija, servisa prve pomoći, stanja bezbjednosti i dr.

Delegat je obavezan da ovjeren spisak od strane kluba sa imenom i prezimenom komesara bezbjednosti, policije, redara, sakupljača lopti, nosača nosila, uz zapisnik, dostavi takmičarskom organu.

Delegat utakmice dužan je da u roku od 24 sata po odigranoj utakmici dostaviti zapisnik utakmice /prva strana/ i izvještaj sudije /druga strana/ u kancelariju NS USK-a putem faxesa broj: 037-220-283.

Delegat utakmice upisuje brojčanu ocjenu sudijama na prvoj strani Zapisnika, kao i opisnu ocjenu u delegatskom izvještaju.

Takmičarska komisija će donijeti posebno uputstvo o vršenju dužnosti delegata koje će dostaviti klubovima, delegatima i sudijama.

Ukoliko na utakmici dođe do incidenta, prekida utakmice i sl. delegat je obavezan u roku od 24 sata dostaviti dopunsko izvješće, a na zahtjev Komisije ili Sekreterijata i u drugim situacijama. Na poziv Sekreterijata ili takmičarskog organa delegate je dužan izvještaj ili dopunski izvještaj dostaviti i ranije.

SUCI UTAKMICE

Član 23.

Sve prvenstvene utakmice nogometnih liga kantona mogu voditi samo suci sa ispitom saveznog nogometnog suca, federalnog suca, kantonalnog suca, kao i sudaca koji se nalaze na listama verifikovanim od strane Izvršnog odbora NS USK-a.

Liste predlaže Komisija za suce i suđenje NS USK-a.

Određivanje sudija vrši nadležni takmičarski organ kojeg imenuje Izvršni odbor NS USK-a.

Nakon određivanja sudac dobija "nalog za suđenje" (lično u kancelariji saveza, putem internet portala NS USK-a), u kojem se navode svi podaci za obavljanje dužnosti (ekipe, mjesto, datum i vrijeme odigravanja utakmice, imena službenih lica, podatke za naplatu troškova).

Član 24.

Sudac utakmice je dužan da prije početka utakmice pogleda i odluči da li je teren pogodan za igru ili nije. Ako sudija utvrdi da je teren nepododan za igru, to konstatuje u zapisnik u skladu sa članom 35. Pravilnika o nogometnim/fudbalskim takmičenjima NS/FS BiH i o tome obavijesti na sastanku koji drži delegat utakmice prije početka utakmice.

Sudac je dužan da prije početka utakmice potpiše prvu stranu zapisnika.

Sudac je dužan da poslije utakmice ispuni sve relevantne podatke u sudačkom izvještaju, da unese sve primjedbe kao opomenute i isključene igrače, da ga potpiše i preda delegatu utakmice, koji će isti dostaviti Sekreterijatu takmičenja zajedno sa svojim izvještajima.

Ukoliko delegirani sudac ne dođe na utakmicu istu će suditi prvi pomoćni sudac, a ako on ne dođe suditi će drugi pomoćni sudac.

Ukoliko na utakmicu ne dođe ni jedan od delegiranih sudaca, klubovi će se sporazumiti da utakmicu sudi jedan od prisutnih sudaca. Ako sporazum između klubova ne bude postignut, onda će delegate odlučiti koji će od prisutnih sudaca suditi utakmicu.

Sporazum o izboru suca mora biti pismeno utvrđen prije početka utakmice. Zapisnik o sporazumu potpisuju oba kapiteana, predstavnici klubova i delegat.

Ako se klubovi nisu sporazumjeli o izboru suca, pa je istog odredio delegate, to se mora konstatovati u posebnom zapisniku sa utakmice koji je sastavni dio zapisnika.

Ukoliko na utakmicu ne dođe jedan ili obojica pomoćnih sudaca glavni sudac će odlučiti o izboru pomoćnih sudaca.

Protiv sudije koji ne dođe na zakazanu utakmicu povest će se disciplinski postupak prema odredbama Disciplinskog pravilnika NS/FS BiH.

SUSPENZIJA

Član 25.

Suspendovani tim,odnosno svi timovi suspendovanog kluba ne mogu nastupati na prvenstvenim utakmicama sve dok traje suspenzija.

Sve odigrane utakmice u vrijeme suspenzije,izrečene zbog neizvršavanja pravosnažnih odluka nadležnih organa ili neizvršavanja nespornih obaveza nastali iz takmičenja predviđenih ovim Propozicijama registrirat će se rezultatom 3:0 /par-forfe/ u korist protivnika.

Ostale utakmice na kojima suspendovani tim nije mogao nastupiti do donošenja konačne odluke o nekom spornom slučaju neće biti registrovane sve dok se ne donese konačna odluka.Po donošenju konačne odluke klub je dužan odigrati utakmice prema rasporedu nadležnog takmičarskog rikovodstva. Ako suspendovani tim nastupi na javnoj utakmici pokrenut će se disciplinski postupak prema odredbama Disciplinskog pravilnika NS/FS BiH ,s tim da će klub snositi takmičarske posljedice ukoliko je na utakmicu uložena žalba prema odredbama Pravilnika o nogometnim/fudbalskim takmičenjima NS/FS BiH.

Klub koji nastupi protiv suspendovanog ili kažnjenog kluba,ukoliko je blagovremeno obaviješten o suspenziji ili kazni,snosit će disciplinske posljedice u skladu sa odredbama Disciplinskog pravilnika NS/FS BiH .

ŽALBE I ODLUČIVANJE PO ŽALBAMA

Član 26.

O regularnosti utakmice stalnog takmičenja može se rješavati na osnovu žalbe oštećenog kluba i izvještaja službenih lica.

Pod oštećenim klubom u smislu predhodnog stave podrazumijeva se svaki klub koji je oštećen rezultatom utakmice na koju se ulaže žalba.

Žalbe po svim osnovama moraju se telegrafski ili faxom najaviti u roku od 24 sata po odigranoj utakmici,a obrazloženje sa dokazom o uplaćenju taksi utvrđenoj odlukom Izvršnog odbora NS USK-a i ovim Propozicijama,ima se dostaviti u roku od 3 /tri / dana od dana odigravanja utakmice.

Ukoliko rok za najavu i ulaganje žalbe ističe u nedjelju ili na državni praznik ,rok za najavu i ulaganje žalbe produžava se za prvi naredni radni dan.

Žalba se dostavlja Komisiji za takmičenje u dva primjerka.

Član 27.

Neblagovremeno najavljene,neobrazložene,netaksirane ili nedovoljno taksirane žalbe neće se uzimati u postupak,već će se odbaciti,a utakmica će se registrovati postignutim rezultatom.

Odluke o uložnim žalbama bit će donijete u roku od 8 /osam/ dana od dana prijema žalbe.

Član 28.

Za utakmice o žalbama u prvom stepenu odlučuje Komisija za takmičenje.

Član 29.

Žalba na prvostepenu odluku može se podnijeti Apelacionoj komisiji NS USK-a u roku od 8 /osam/ dana od dana prijema pismene odluke prvostepenog organa.

Drugostepena odluka mora biti donesena u roku od 8 /osam/ dana od dana prijema žalbe .

Drugostepena odluka je konačna.

Protiv odluke drugostepenog organa može se podnijeti zahtjev za preispitivanje odluke Izvršnom odboru NS USK-a u roku od 8 /osam/ dana od dana prijema odluke drugostepenog organa.

Izvršni odbor NS USK-a će po zahtjevu kluba rješavati u roku od 15 /petnaest/ dana računajući od dana prijema istog uz obavezno predhodno mišljenje Komisije za propise /član 79.Pravilnika o nogometnim/fudbalskim takmičenjima NS/FS BiH/.

Član 30.

Takse na žalbe u prvom i drugom stepenu vezane za Pravilnik o nogometnim takmičenjima NS/FS BiH,Disciplinski pravilnik NS/FS BiH i preispitivanje odluke pred Izvršnim odborom NS USK-a su slijedeće:

- Taksa u prvom stepenu za klub iznosi.....200,00 KM
- Taksa u drugom stepenu za klub iznosi 400,00 KM
- Taksa za pojedince iznosi 50% od takse koju plaćaju klubovi.

Eventualne troškove žalbenog postupka snosi klub koji ih je prouzrokovao.
Sredstva od naplaćenih taksi za žalbe pripadaju prihodima NS USK-a.

REGISTRACIJA UTAKMICA

Član 31.

Ako na utakmicu nije uložena žalba, a ne postoje uvjeti za registraciju po službenoj dužnosti sa 3:0 / par-forfe /, utakmica se registruje postignutim rezultatom.

Ako je prvostepena odluka pravosnažna ili je donesena drugostepena odluka koja je konačna, jednom registrovana utakmica ne može biti poništena, izuzev u postupku pred Izvršnim odborom NS USK-a.

Komesar za takmičenje vrši registraciju odigranih utakmica najkasnije u roku od 21 /dvadesetjedan/ dan od dana odigravanja utakmice.

Ako je uložena žalba, rok za registraciju utakmice produžava se do konačne odluke.

DISCIPLINSKE ODREDBE

Član 32.

O disciplinskim prekršajima igrača, službenih predstavnika (trener, fizioterapeut, zvanični predstavnik kluba, komesar za bezbjednost/ i klubova koji učestvuju u takmičenju odlučuje se osnovu Disciplinskog pravilnika NS/FS BiH i posebnih odluka IO NS USK-a.

Prvostepene odluke o disciplinskim prekršajima donosi nadležni Disciplinski sudija NS USK-a u roku od 8 /osam / dana po odigranoj utakmici, odnosno podnesenoj prijavi.

Drugostepene odluke po žalbama na odluke disciplinskog sudije NS USK-a donosi Apelaciona komisija, a žalba ovom organu podnosi se u roku od 8 (osam) dana nakon prijema pismene prvostepene odluke putem prvostepenog organa.

Drugostepeni organ će svoje odluke donijeti u roku od 8 (osam) dana računajući od dana prijema žalbe.

Disciplinske odluke o disciplinskim prekršajima su konačne.

Protiv odluke drugostepenog organa, može se podnijeti prijedlog za ponavljanje postupka Izvršnom odboru NS USK-a u roku od 8 (osam) dana od dana prijema pismene odluke drugostepenog organa. Prijedlog za ponavljanje postupka podnosi se putem Komisije za propise koja je obavezna dati svoje mišljenje.

Izvršni odbor NS USK-a će prijedlog riješiti u roku od 30 (trideset) dana.

Automatska kazna zabrane igranja jedne prvenstvene ili kup utakmice nastaje poslije svake 3 (treće) javne opomene koju igrač dobije na prvenstvenoj ili kup utakmici u toku jedne takmičarske godine, a automatski prestaje poslije prvenstvene ili kup utakmice na kojoj je igrač morao da pauzira pa i u slučaju nastupa igrača pod automatskom kaznom na toj utakmici.

Javne opomene (žuti) kartoni radi koji je igrač dobio crveni karton ne evidentiraju se, evidentira se samo crveni karton.

UTVRĐIVANJE PLASMANA

Član 33.

Plasman klubova na tabeli utvrđuje se prema odredbama člana 42. Pravilnika o nogometnim takmičenjima NS/FS BiH.

VRIJEME TRAJANJA UTAKMICE

Član 34.

Utakmice se igraju dva puta po 45 (četrdesetpet) minuta. Odmor između poluvremena traje 10-15 minuta.

Ova odredba je u skladu sa Pravilima nogometne igre.

FINANCIJSKE ODREDBE

Član 35.

Svaka prvenstvena utakmica podliježe slijedećim troškovima koje snosi klub domaćin :

- Naknada troškova za sudce bez odbitaka, a na osnovu priloženog naloga NS USK,
- Naknada troškova za delegata bez odbitaka, a na osnovu priloženog naloga NS USK-a.

Visinu takse sudijama i delegatu utakmice utvrđuje Izvršni odbor NS USK-a. Pored takse, licima iz predhodnog stava pripadaju i putni troškovi utvrđeni posebnom odlukom IO NS USK-a.

Sve isplate vrše se poslije utakmice.

Klubovi koji uplatu troškova utakmice vrše putem žiro računa, dužni su troškove uplatiti svakoj službenoj osobi pojedinačno na njivo tekuće žiro račune, u roku od 48 sati po odigranoj utakmici.

Ukoliko klub,u roku navedenom u predhodnom stavu,ne isplati službena lica ili ih djelomično isplati,klubu se ostavlja rok od 24 sata da troškove izmiri nakon čega nastupa automatska suspenzija i klub sve do izmirenja obaveza u cijelosti nemože igrati zvanične utakmice,a zbog zanemarivanja obaveza bit će disciplinski sankcionisan novčanom kaznom u iznosu od 100 KM. U slučaju da utakmica nije odigrana iz razloga za koji službena lica ne snose krivicu,a doputovali su u mjesto odigravanja i na stadion,pripadaju im putni troškovi shodno odluci IO NS USK-a.

Član 36.

Izvršni odbor NS USK-a prije početka prvenstva donosi odluku o visini troškova takmičenja. Neizvršenje obaveza iz člana 35. ovih Propozicija povlači disciplinske posljedice u skladu sa odredbama Disciplinskog pravilnika NS/FS BiH.

POSEBNE ODREDBE

Član 37.

Taksa na žalbe po bilo kojem osnovu iz Propozicija za klubove članove NS USK-a i pojedince uplaćuje se na žiro račun NS USK-a broj: 338-500-22005184-45 Unicredit Zagrebačka banka.

Član 38.

Prvaku NS USK-a obavezno se dodjeljuje pehar u trajno vlasništvo,a na prijedlog Komisije za takmičenje Izvršni odbor NS USK-a može donijeti odluku o dodijeli i druga priznanja i nagrada. Odluke o dodjeli pehara, raznih priznanja i o dodjeli nagrada donosi Izvršni odbor NS USK-a,a na prijedlog Komisije za takmičenje .

Član 39.

Za vrijeme odigravanja prvenstvenih i kup utakmica u igralištu pored terena za igru,u zaštićenim kabinama,mogu se nalaziti slijedeća lica:

1. predstavnik kluba sa odobrenjem kluba i licencom NS USK-a,
2. šef stručnog štaba sa ispravnom legitimacijom trenera NS USK-a i licencom,
3. trener kluba sa ispravnom legitimacijom trenera NS USK-a i licencom,
4. pomoćni trener sa ispravnom legitimacijom trenera NS USK-a i licencom,
5. rezervni igrači u sportskoj opremi: 7 /sedam/,
6. ljekar kluba sa ispravnom legitimacijom NS USK-a,
7. fizioterapeut sa ispravnom legitimacijom NS USK-a i licencom.

POPUNJAVANJE LIGE

Član 40.

Prvoplasirana ekipa iz nogometne lige kantona ostvaruje plasma u drugu ligu NS F BiH grupa "zapad".Popunjavanje nogometne lige kantona NS USK-a vrši se sa klubovima koji napuštaju drugu ligu NS F BiH grupa "zapad" i uključivanjem novoformiranih ili aktiviranjem rada ranije postojećih klubova koji ispunjavaju uslove iz Propozicija takmičenja NS USK-a.

ZAVRŠNE ODREDBE

Član 41.

Za sve što nije predviđeno ovim Propozicijama važe odredbe Pravilnika o nogometnim/fudbalskim takmičenjima NS/FS BiH,odredbe Disciplinskog pravilnika NS/FS BiH i odredbe ostalih normativnih akata NS/FS BiH i NS F BiH .

Član 42.

Izmijene i dopune ovih Propozicija vrše se prema istom postupku ,kao i njihovo donošenje. Stupanjem na snagu ovih Propozicija prestaju važiti odredbe ranijih Propozicija.

Član 43.

Ove Propozicije stupaju na snagu danom donošenja,a primijenjuju se za takmičarsku 2013/2014 godinu i objavit će se u Biltenu NS USK-a.

TAKMIČARSKA KOMISIJA
Asim Selimović,s.r

IZVRŠNI ODBOR NS USK-a
Amir Hadžić,s.r